



# SLUŽBENE NOVINE TUZLANSKOG KANTONA

GODINA 16 • TUZLA, CETVRTAK 17. DECEMBAR 2009. GODINE • IZDANJE NA BOSANSKOM JEZIKU • BROJ 14

539

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 30.11.2009. godine, donosi

## ZAKON

### O POREZU NA IMOVINU, NASLJEĐE I POKLON

#### I. OPĆE ODREDBE

##### Član 1.

Ovim zakonom uređuju se porezi koje plaćaju fizička lica i pravna lica (u daljem tekstu: porezi) na području Tuzlanskog kantona (u daljem tekstu: Kanton).

#### II. VRSTE I RASPODJELA POREZA

##### Član 2.

Porezi propisani ovim zakonom su:

1. Porez na imovinu,
2. Porez na nasljeđe i poklon.

##### Član 3.

Prihodi od poreza propisanih članom 2. ovog zakona se raspoređuju u budžete općina u iznosu od 100%.

#### 1. POREZ NA IMOVINU

##### Član 4.

Obveznik poreza na imovinu je fizičko i pravno lice koje je vlasnik slijedeće imovine:

1. zgrade ili stana za odmor i rekreaciju,
2. poslovne prostorije, stambene zgrade, stana, garaže i parking prostora koji se izdaju pod zakup,
3. motornog vozila,
4. plovnog objekta
5. vazduhoplova ili letjelice u vlasništvu fizičkog lica.

Obveznik poreza na imovinu je fizičko i pravno lice koje je vlasnik ili korisnik slijedeće imovine:

1. stola za igru u kasinu,
2. automata za igru na sreću,
3. automata za zabavne igre.

Ako je imovina u vlasništvu ili je koristi više lica svako od njih je porezni obveznik srazmjerno dijelu vlasništva, odnosno dijelu koji koristi.

##### Član 5.

Porez na imovinu plaća se godišnje u paušalnom iznosu i to:

1. za zgradu ili stan za odmor i rekreaciju ----- 1 KM po 1 m<sup>2</sup>
2. za poslovnu prostoriju, stambenu zgradu, stan i garažu koji se izdaju u zakup:
  - a) za poslovni prostor koji se izdaje pod zakup za:
    - kancelarijski, ugostiteljski ili trgovinski koji se nalazi u stambenoj zgradi, poslovno-stambenoj zgradi ili poslovnom centru ..... 2,5 KM po 1m<sup>2</sup>
    - kancelarijski, ugostiteljski ili trgovinski koji se nalazi u porodičnoj kući ..... 1 KM po 1m<sup>2</sup>
    - skladišni, proizvodni ..... 1 KM po 1m<sup>2</sup>
  - b) za stambenu zgradu i stan koji se izdaju pod zakup ..... 1 KM po 1 m<sup>2</sup>
  - c) za garažu koja se izdaje pod zakup ..... 1 KM po 1 m<sup>2</sup>
  - d) za parking prostor koji se izdaje u zakup ..... 2 KM po 1m<sup>2</sup>
3. za motorno vozilo i to:
  - a) putničko motorno vozilo do 8 godina starosti:
    - do 1600 cm<sup>3</sup> ..... 30 KM
    - od 1600 cm<sup>3</sup> do 1800 cm<sup>3</sup> ..... 50 KM
    - od 1800 cm<sup>3</sup> do 2000 cm<sup>3</sup> ..... 70 KM
    - preko 2000 cm<sup>3</sup> ..... 200 KM
  - b) za putničko motorno vozilo preko 8 godina starosti 20 KM
  - c) za teretno motorno vozilo do 10 godina starosti:
    - do 3 t ..... 100 KM
    - od 3 t do 8 t ..... 200 KM
    - preko 8 t ..... 300 KM
  - d) za teretno motorno vozilo preko 10 godina starosti 70 KM
  - e) za motocikl:
    - do 50 cm<sup>3</sup> do 10 godina starosti ..... 40 KM
    - od 50 cm<sup>3</sup> do 150 cm<sup>3</sup> do 10 godina starosti ..... 60 KM
    - od 150 cm<sup>3</sup> do 750 cm<sup>3</sup> do 10 godina starosti ..... 100 KM
    - od 750 cm<sup>3</sup> do 1100 cm<sup>3</sup> do 10 godina starosti ..... 250 KM
    - preko 1100 cm<sup>3</sup> do 10 godina starosti ..... 350 KM
    - preko 50 cm<sup>3</sup> i preko 10 godina starosti ..... 30 KM
4. za plovni objekat:
  - a) do 5 m dužine bez motornog pogona ..... 30 KM
  - b) od 5 m do 10 m dužine bez motornog pogona ..... 50 KM
  - c) preko 10 m dužine bez motornog pogona ..... 70 KM
  - d) do 5 m dužine sa motornim pogonom ..... 50 KM
  - e) od 5 m do 10 m dužine sa motornim pogonom ..... 70 KM
  - f) preko 10 m dužine sa motornim pogonom ..... 100 KM
  - g) do 5 m dužine sa motornim pogonom
    - preko 73,6 kW ..... 600 KM
  - h) preko 5 m dužine sa motornim pogonom
    - preko 73,6 kW ..... 1000 KM
  - i) skuter ..... 100 KM

5. po stolu u kasinu ----- 10.000 KM
6. automat za igru na sreću ----- 2.000 KM
7. automat za zabavne igre ----- 800 KM
8. za vazduhoplov i letjelicu na motorni pogon u vlasništvu fizičkog lica:
  - a) veličine do 6 sjedišta ----- 500 KM
  - b) veličine od 7 do 12 sjedišta ----- 1.000 KM
  - c) veličine preko 12 sjedišta ----- 2.000 KM.

Obveznici poreza na imovinu koja podliježe obavezi registracije, plaćaju porez na imovinu prije registracije kod nadležnog organa. Bez dokaza o plaćenom porezu ne može se izvršiti registracija.

Porez na imovinu iz stava 1. tačaka 1., 2., 4., 5., 6. i 7. ovog člana, plaća se u roku od 8 dana od krajnjeg roka za podnošenje prijave.

#### Član 6.

Porez na imovinu ne plaćaju:

1. Bosna i Hercegovina, Federacija Bosne i Hercegovine, kantoni i općine,
2. strane države pod uslovom reciprociteta,
3. invalidna lica na jedan putnički automobil nabavljen jedan puta u periodu do 5 godina,
4. vlasnici zgrada ili stanova za odmor ili rekreaciju koje koriste u stambene svrhe obveznik i članovi njegove porodice, izbjegla ili raseljena lica, kao i vlasnici objekata koji su oštećeni preko 70%,
5. na imovinu koja vlasniku služi za obavljanje osnovne djelatnosti, osim imovine iz člana 4. stav 2.,
6. vjerske institucije i Crveni križ/krst Tuzlanskog kantona i općinske organizacije Crvenog križa/krista na području Kantona.

#### Član 7.

Ako u toku kalendarske godine dođe do promjene vlasništva nad imovinom novi vlasnik ne plaća porez na tu imovinu za tu kalendarsku godinu, ako je taj porez naplaćen od ranijeg vlasnika.

#### Član 8.

Porez na imovinu razrezuje se unaprijed u godišnjem iznosu za imovinu zatečenu u posjedu poreznog obveznika na dan 1. januar godine za koju se razrez vrši, a za imovinu stečenu tokom godine u visini koja odgovara srazmjerno vremenu od dana sticanja do kraja godine, a na osnovu porezne prijave, odnosno evidencija i drugih pokazatelja.

#### Član 9.

Nadležni organi koji vode evidenciju o imovini iz člana 4. ovog zakona na koju se plaća porez, dužni su dostaviti nadležnoj organizacionoj jedinici Porezne uprave (u daljem tekstu: Porezna uprava) podatke o vlasnicima i njihovoj imovini.

Organ nadležan za izdavanje odobrenja za građenje objekata dužan je da o izdatim odobrenjima mjesečno obavještava Poreznu upravu na čijem području se vrši građenje i na čijem je području prebivalište vlasnika objekta.

Organ nadležan za ovjeru potpisa ugovora o zakupu imovine i notari, dužni su ovjerene ugovore o zakupu imovine dostaviti nadležnoj poreznoj ispostavi u roku od 8 dana od dana ovjere istih.

## 2. POREZ NA NASLJEĐE I POKLON

#### Član 10.

Obveznik poreza na nasljeđe i poklon je fizičko lice koje na teritoriji Kantona naslijedi ili primi na poklon imovinu podložnu plaćanju poreza na nasljeđe i poklon.

Obveznik poreza na nasljeđe i poklon je i lice koje naslijedi odnosno primi na poklon pravo uživanja ili korištenja nepokretnosti.

#### Član 11.

Porezu na nasljeđe i poklon podliježe zemljište, zgrade i ostala nepokretna imovina, kao i pravo uživanja, odnosno korištenja, na toj nepokretnoj imovini koju fizičko lice stiče na teritoriji Kantona na osnovu Zakona o nasljeđivanju, odnosno ugovora o poklonu među živim ili za slučaj smrti.

Porezu na nasljeđe i poklon podliježe pokretna imovina čija prometna vrijednost prelazi 2.000 KM.

#### Član 12.

Porezna obaveza poreza na nasljeđe i poklon nastaje u trenutku pravosnažnog rješenja o nasljeđivanju, odnosno u trenutku prijema poklona.

Poklon se smatra primljenim u trenutku potpisivanja ugovora o poklonu, a ako ugovor nije zaključen u pismenoj formi, u trenutku kada je poklon primljen.

Ako je nepokretna imovina koja je predmet nasljeđivanja odnosno poklona opterećena pravom uživanja, obaveza nasljednika odnosno poklonoprimca za plaćanje poreza na nasljeđe odnosno poklon nastaje po prestanku prava na uživanje.

#### Član 13.

Osnovica poreza na nasljeđe i poklon je prometna vrijednost naslijedene ili na poklon primljene imovine u času nastanka porezne obaveze po odbitku dugova i troškova koji terete imovinu na koju se plaća ovaj porez.

Osnovica iz prethodnog stava umanjuje se i za iznos sredstava koje nasljednik uloži u imovinu, koja je predmet nasljeđa, prije nastanka porezne obaveze.

#### Član 14.

Prometnu vrijednost naslijedene ili na poklon primljene imovine u prethodnom članu utvrđuje Porezna uprava na način i po postupku utvrđenom propisima o porezu na promet nepokretnosti i prava.

#### Član 15.

Vrijednost svih poklona primljenih u toku jedne kalendarske godine od istog poklonodavca čini jednu poreznu osnovicu.

Ako se nasljeđe ili poklon sastoji iz imovine na koju se plaća porez na nasljeđe i poklon i iz imovine na koju se ovaj porez ne plaća, od vrijednosti imovine koja podliježe porezu odbija se srazmjerni dio ukupnih dugova, tereta i troškova koji otpadaju na tu imovinu.

Ako se nasljednik odrekne prava nasljedstva u korist drugog lica bez naknade, odnosno protunaknade, stopa poreza na nasljeđe i poklon utvrđuje se prema prometnoj vrijednosti nasljednog dijela imovine, zavisno o nasljednom redu lica koje je naslijedilo imovinu na osnovu odreknuća u odnosu na ostavioca.

#### Član 16.

Porez na nasljeđe plaća se po stopi od 2% od poreske osnovice.

Porez na poklon plaća se po stopi od 3% od poreske osnovice do trećeg nasljednog reda.

Ostali poklonoprимci plaćaju porez na poklon po odredbama Zakona o porezu na promet nepokretnosti i prava.

#### Član 17.

Porez na nasljeđe i poklon ne plaća:

1. nasljednik, odnosno poklonoprимac prvog nasljednog reda, braćni drug ako je u drugom nasljednom redu, roditelji kada nasljeđuju i primaju na poklon imovinu od djece,
2. nasljednik drugog nasljednog reda, pod uslovom da je sa ostaviocem u trenutku njegove smrti živio u zajedničkom domaćinstvu,
3. nasljednik koji nije u prvom nasljednom redu, a nasljeđuje poljoprivredno zemljište, a kome je poljoprivreda osnovno zanimanje.

**Član 18.**

Porez na nasljeđe i poklon ne plaća se na:

1. predmete domaćinstva,
2. na imovinu na koju nasljednik, odnosno poklonoprimalac ne može steći pravo vlasništva, pravo uživanja, odnosno korištenja.
3. na imovinu koja se ustupi bez naknade Bosni i Hercegovini, Federaciji Bosne i Hercegovine, Kantonu, općini, vjerskim institucijama i humanitarnim organizacijama.

Porez uplaćen prije ustupanja ili poklona ne vraća se.

**Član 19.**

Razrez poreza na nasljeđe i poklon vrši Porezna uprava općine na čijem se području nalazi imovina. U slučaju da naslijeđena imovina, odnosno poklon, sadrži samo pokretnu imovinu, porez razrezuje nadležna Porezna uprava u prebivalištu obveznika poreza.

Ako se naslijeđena ili na poklon primljena imovina nalazi na području dvije ili više općina, razrez poreza vrši Porezna uprava prema mjestu gdje se imovina nalazi.

**Član 20.**

Primjerak pravosnažnog rješenja o nasljeđivanju i ugovora o poklonu nepokretne imovine, nadležni sud i notar su dužni dostaviti Poreznoj upravi, u roku od 15 dana od pravosnažnosti rješenja, odnosno ovjere ugovora.

**Član 21.**

Za neblagovremeno plaćanje poreza propisanih ovim zakonom plaća se zatezna kamata, po stopi utvrđenoj propisima Federacije Bosne i Hercegovine za neblagovremeno plaćanje javnih prihoda.

**Član 22.**

Obveznicima poreza na nasljeđe i poklon porez se utvrđuje rješenjem Porezne uprave.

Obveznici poreza na nasljeđe i poklon dužni su razrezani porez platiti u roku od 15 dana od dana prijema rješenja.

**III. UTVRĐIVANJE I NAPLATA POREZA****Član 23.**

Obveznici poreza na imovinu, dužni su podnijeti poreznu prijavu Poreznoj upravi do kraja februara godine u kojoj se vrši razrez.

Oblik i sadržaj porezne prijave propisuje ministar finansija.

Ako obveznik poreza u toku godine stekne imovinu na koju se plaća porez na imovinu, dužan je podnijeti poreznu prijavu u roku od 15 dana od dana sticanja imovine.

**Član 24.**

Obveznici poreza, koji su dužni podnijeti poreznu prijavu za razrez, moraju blagovremeno javnim pozivom biti pozvani na podnošenje porezne prijave.

Javni poziv za podnošenje porezne prijave objavljuje Porezna uprava.

**Žalba****Član 25.**

Protiv akta Porezne uprave donesenog u prvom stepenu može se izjaviti žalba nadležnom organu za rješavanje po žalbi, u skladu sa Zakonom o Poreznoj upravi Federacije Bosne i Hercegovine.

**Obnova postupka****Član 26.**

Porezna uprava, koja je donijela rješenje o utvrđivanju poreza kojim je okončan postupak utvrđivanja poreza, može sama ili na zahtjev obveznika obnoviti postupak u roku od pet godina nakon njegove pravosnažnosti prema odredbama Zakona o upravnom postupku.

**Prisilna naplata poreza****Član 27.**

Od poreznog obveznika, koji dospjeli porez propisan ovim zakonom nije platio u propisanom roku (u daljem tekstu: porezni dužnik), porez se prisilno naplaćuje u skladu sa načinom i postupcima prisilne naplate propisane Zakonom o Poreznoj upravi Federacije Bosne i Hercegovine.

**Jamstvo****Član 28.**

Ako je imovina u zajedničkom vlasništvu više lica, onda ta lica solidarno odgovaraju za obaveze po osnovu poreza na imovinu.

**Zastara****Član 29.**

Na rokove zastare prava na utvrđivanje porezne obaveze, prava na naplatu poreza, kamata i troškova prisilnog izvršenja i novčanih kazni, pravo poreznog obveznika na povrat nepravilno ili više plaćenih iznosa poreza, kamata, troškova prisilnog izvršenja i novčanih kazni i pokretanje prekršajnog postupka zbog povreda odredbi ovoga zakona primjenjuju se odredbe Zakona o poreznoj upravi Federacije Bosne i Hercegovine.

**Član 30.**

Propisi o zastari potraživanja, ako nisu u suprotnosti sa ovim zakonom, primjenjuju se i na zastaru prava utvrđivanja i naplate poreznih obaveza.

**Član 31.**

Nadzor nad obračunavanjem i plaćanjem poreza propisanih ovim zakonom vrši nadležna Porezna uprava.

**IV. KAZNE NE ODREDBE****Član 32.**

Novčanom kaznom od 250,00 KM do 1.250,00 KM, kaznit će se za prekršaj fizičko lice:

1. Porezni obveznik koji ne podnese poreznu prijavu u propisanom roku (član 23. st. 1. i 3.),
2. Porezni obveznik koji ne plati porez u propisanom roku (član 5. stav 3. i član 22. stav 2.).

**Član 33.**

Novčanom kaznom od 500,00 KM do 7.500,00 KM, za prekršaj će se kazniti pravno lice:

1. Porezni obveznik koji ne podnese poreznu prijavu u propisanom roku (član 23. st. 1. i 3.),
2. Porezni obveznik koji ne plati porez u propisanom roku (član 5. stav 3. i član 22. stav 2.).

Novčanom kaznom od 100,00 KM do 1.000,00 KM, za prekršaj propisan u stavu 1. ovog člana, će se kazniti i odgovorno lice u pravnom licu.

**Član 34.**

Novčanom kaznom od 100,00 KM do 1.500,00 KM, za prekršaj će se kazniti ovlašteno službeno lice u nadležnom organu:

1. koje ne dostavi podatke o vlasniku i njegovoj imovini i mjesečno ne izvještava nadležnu poreznu upravu o izdatim odobrenjima za građenje (član 9.),
2. koje ne dostavi u propisanom roku rješenje o nasljeđivanju ili ugovor o poklonu (član 20.).

**V. PRIJELAZNE I ZAVRŠNE ODREDBE****Član 35.**

Ministar finansija će u roku od 30 dana od dana stupanja na snagu ovog zakona donijeti Pravilnik o primjeni odredaba Zakona o porezu na imovinu, nasljeđe i poklon.

Odredbe Pravilnika o primjeni odredaba Zakona o kantonalnim porezima („Službene novine Tuzlanskog kantona”, br. 4/04, 7/04 i 11/04), u dijelu koji se odnosi na porez na imovinu i porez na nasljeđe i poklon, primjenjivat će se do donošenja novog pravilnika u skladu sa ovim zakonom.

#### Član 36.

Porezne obaveze nastale do dana stupanja na snagu ovog zakona, izvršit će se prema propisima koji su se primjenjivali u momentu nastanka porezne obaveze.

#### Član 37.

Danom stupanja na snagu ovog zakona prestaje da važi Zakon o kantonalnim porezima („Službene novine Tuzlanskog kantona”, br. 13/03, 6/06 i 13/06).

#### Član 38.

Ovaj zakon stupa na snagu osmog dana od dana objavljivanja u “Službenim novinama Tuzlanskog kantona”.

<p>Bosna i Hercegovina - Federacija Bosne i Hercegovine - TUZLANSKI KANTON Skupština Broj: 01-02-168-15/09 Tuzla, 30.11.2009. godine</p>	<p>Predsjednik Skupštine Tuzlanskog kantona, Mr. sci. Amir Fazlić, v.r.</p>
--	---

540

Na osnovu člana 24. stav 1. tačka c) Ustava Tuzlanskog kantona (“Službene novine Tuzlansko-podrinjskog kantona”, br. 7/97 i 3/99 i “Službene novine Tuzlanskog kantona”, br. 13/99, 10/00, 14/02, 6/04 i 10/04), i člana 23. Zakona o zaštiti prava pripadnika nacionalnih manjina u Federaciji Bosne i Hercegovine (“Službene novine FBiH”, br. 56/08), na prijedlog poslanika u Skupštini Tuzlanskog kantona Amira Fazlića, Igora Rajnera i Tome Vidovića, Skupština Tuzlanskog kantona, na sjednici održanoj 30.11.2009. godine, d o n o s i

## ZAKON

### O ZAŠTITI PRAVA PRIPADNIKA NACIONALNIH MANJINA U TUZLANSKOM KANTONU

#### I. OSNOVNE ODREDBE

##### Član 1.

##### Predmet zakona

Ovim zakonom se, u skladu sa Zakonom o zaštiti prava pripadnika nacionalnih manjina u Federaciji Bosne i Hercegovine (“Službene novine Federacije Bosne i Hercegovine”, br. 56/08) i Evropskom okvirnom konvencijom za zaštitu nacionalnih manjina, bliže uređuju način, dinamika i institucije za ostvarivanje prava i obaveze pripadnika nacionalnih manjina u Tuzlanskom kantonu (u daljnjem tekstu: Kanton), te obaveze organa vlasti u Kantonu da poštuju, štite i razvijaju etnički, kulturni, jezički i vjerski identitet svakog pripadnika nacionalne manjine u Kantonu koji je državljanin Federacije Bosne i Hercegovine (u daljem tekstu: Federacija) odnosno Bosne i Hercegovine, a stanovnik je Kantona.

##### Član 2.

##### Okvirna konvencija za zaštitu nacionalnih manjina

Okvirna konvencija za zaštitu nacionalnih manjina Vijeća Evrope neposredno se primjenjuje u Kantonu kao dio pravnog sistema Federacije.

##### Član 3.

##### Nacionalne manjine

(1) Nacionalna manjina, u skladu sa ovim zakonom, dio je stanovništva Kantona, koji su državljani Federacije, odnosno Bosne

i Hercegovine, ne izjašnjavaju se kao pripadnici Bošnjačkog, Hrvatskog ili Srpskog naroda kao konstitutivnih naroda, a sačinjavaju je ljudi istog ili sličnog etničkog porijekla, iste ili srodne tradicije, običaja, vjerovanja, jezika, kulture i duhovnosti, bliske ili srodne historije i drugih obilježja.

(2) Kanton, grad i općina u Kantonu štite položaj i ravnopravnost pripadnika nacionalnih manjina: Albanaca, Crnogoraca, Čeha, Italijana, Jevreja, Mađara, Makedonaca, Nijemaca, Poljaka, Roma, Rumuna, Rusa, Rusina, Slovaka, Slovenaca, Turaka, Ukrajinaca i drugih koji ispunjavaju uslove iz stava (1) ovog člana.

#### Član 4.

##### Jemstvo Kantona

Pripadnicima nacionalnih manjina u Kantonu garantuje se i omogućava ostvarivanje prava na slobodu organizovanja i mirnog okupljanja radi ispoljavanja i zaštite svojih kulturnih, vjerskih, obrazovnih, socijalnih, ekonomskih i političkih sloboda, prava, interesa, potreba i identiteta, u skladu sa zakonom.

#### Član 5.

##### Osiguranje finansijskih sredstava

Vlada Kantona i resorna ministarstva će u okviru svojih budžetskih sredstava planirati i osigurati sredstva radi ostvarivanja prava koja pripadaju nacionalnim manjinama na osnovu ovog zakona. Sredstva će se dodjeljivati po osnovu javnog poziva za finansiranje troškova rada, kao i za projekte aktivnosti udruženja koja okupljaju pripadnike nacionalnih manjina.

#### II. ZNAKOVI I SIMBOLI

##### Član 6.

##### Znakovi i simboli nacionalnih manjina

(1) Pripadnici nacionalnih manjina, njihova udruženja, institucije i oblici organizovanja i djelovanja mogu slobodno isticati i nositi znakove i simbole nacionalne manjine kojoj pripadaju.

(2) Na organizovanim manifestacijama i skupovima pripadnika nacionalnih manjina se, uz simbole nacionalnih manjina, obavezno ističu i službeni simboli (državni, federalni, kantonalni, gradski i općinski), u skladu sa važećim propisima.

#### III. UPOTREBA JEZIKA

##### Član 7.

##### Upotreba jezika nacionalnih manjina

(1) U gradu, općini, mjesnoj zajednici ili naseljenom mjestu, u kojima pripadnici nacionalne manjine čine većinu stanovništva, organi vlasti osiguraće da natpisi institucija, lokalni nazivi, imena ulica i drugih topografskih oznaka, namijenjenih javnosti, budu ispisani i istaknuti i na jeziku manjine koja to zahtijeva.

(2) Grad i općina mogu svojim statutima utvrditi da prava iz prethodnog stava mogu ostvarivati pripadnici nacionalne manjine i kada ne čine većinu stanovništva, već kada čine u gradu, općini ili naseljenom mjestu više od jedne trećine stanovništva.

#### IV. OBRAZOVANJE

##### Član 8.

(1) Pripadnici nacionalne manjine mogu učiti jezik, književnost, historiju i kulturu i na jeziku manjine kojoj pripadaju.

(2) Ministarstvo obrazovanja, nauke, kulture i sporta Tuzlanskog kantona, u okviru predškolskog, osnovnog i srednjeg obrazovnog programa, obavezno je u školama u kojima učenici – pripadnici jedne nacionalne manjine čine najmanje jednu trećinu ukupnog broja učenika u školi osigurati obrazovanje na jeziku te manjine, a ako čine jednu petinu, osigurati dodatnu nastavu o jeziku, književnosti, historiji, geografiji i kulturi manjine kojoj pripadaju, ako to zahtijeva većina njihovih roditelja.